

Copyright is owned by the Author of the thesis. Permission is given for a copy to be downloaded by an individual for the purpose of research and private study only. The thesis may not be reproduced elsewhere without the permission of the Author.

Te Ira Tangata

“Ahakoa iti, he iti mapihi pounamu

He kākano i ruia mai i Rangiātea, e kore e ngaro.”



He tuhinga whakapae mō te whakaaturanga toi hei tutuki mo te tohu nei

Master of Māori Visual Arts

Ki Massey University, Te Papaioea

Aotearoa

Rereao Te Reo Irirangi Hineraukatauirā Taite

2022

Whakarāpopoto

Ko te tuhinga nei, e whakaatu ana i taku tiki kōrero me ōna wāhangaa. Ka tīmata ki ngā waewae, ki te tūāpapa o aku mahi, ki Te Aho Matua, ki ngā kōrero whakapapa, ki ngā mōteatea anō hoki. Ka piki ki ngā ringaringa o tōku tiki, arā ki ngā ringatoi e rua i noho hei tauira mōku i roto i ngā āhuatanga o te waihanga kōwhaiwhai, ngā mahi paparanga o te kōwhaiwhai, hei tāpiri te huarahi kōwhiri i ngā tae. Ka haere tonu ki te puku o taku tiki, arā ki āku mahi toi nō te tau 2021, ‘Te Koero Whakanoa’ me tōna hononga ki aku mahi toi mō te tuhinga whakapae nei. Hei whakakapi ka mutu ki te upoko o tōku tiki, arā, ki kōnei kōrero ai mō te whakaaturanga toi Te Ira Tangata: “Ahakoa iti, he iti mapihi pounamu. He kākano i ruia mai i Rangiātea, e kore ia e ngaro. Nō ngā rangi tuhāhā te wairua o te tangata, i tōna whakairatanga ka hono te wairua me te tinana o te tangata i taua wā tonu, ā ka tau tōna mauri, tōna tapu, tōna wehi, tōna iho matua, tōna auahatanga, tōna ngakau, tōna pumanawa. Nā ka tupu ngātahi te wairua me te tinana i roto i te kōpū o te whaea, whānau noa.” Ko tāku he whakamarāma i te tino uaratanga o ngā kupu nei ki te whakairatanga o te tangata, otirā ki a ngāi Māori.

Mihi Aroha

Ka tiki ka rere aku mihi, ki te rahi, ki te tini i tautoko mai i ahau i roto i ngā tau i raro i te marumaru o Toioho ki Apiti.

Ko ngā whakaaro kei te hunga e pupuri ana ki te aka o Pohutukawa, ka mau tonu tēnei tuhinga whakapae i ēra o ngā kōrero kua whakaheke mai ki ahau.

Ko āku mihi tuatahi ki te kaupapa e tāwharau ana i ngā toi, me ngā kōrero whakaheke.

Ko ngā mihi tuarua ki te whare, arā ki Te Pūtahi-ā-Toi, nāu i tauawhi i ngā tini wānanga, otirā i te tini tangata anō hoki.

Ka huri aku mihi ki ngā Pou o te kaupapa, arā ki a Kura Te Waru-Rewiri kōutou ko Erena Arapere, ko Karangawai Marsh, waihoki ki a kōutou kua wehe i a Toioho ki Āpiti, arā ki a Israel me Clayton. Hei tāpiri ki tēnei ki aku pia o Toioho Ki Āpiti me kore ake ko koutou katoa kua kore te kaupapa, kua kore ahau e whakatutuki i ngā mahi nei.

E tika ana me mihi ki a Ngātaiharuru Taeapa rāua ko Saffronn Te Ratana, nā rāua i akiaki au ki te whai i te toi, otirā i whakatuwhera i ngā tatau o tō rāua whare toi hei wāhi wānanga mōku.

Ko aku mihi whakamutunga ki tāku whānau whānui, otirā ki aku hoa i kaha akiaki i au, i roto i ngā aupiki me ngā auheke o te tuhinga whakapae nei, otirā aku tau i te whare wānanga.

Rarangi Upoko:

Whakarāpopoto	I
Mihi Aroha	II
Rarangi Whakaahua	IV
Kupu Whakataki:	1
Ngā waewae o taku tiki (Wāhanga Tahī): Te Aho Matua	3
Te Mauri	4
Te Iho Matua.....	4
Te Ihi me te Tapu.....	4
Te Mana me te Wehi.....	4
Te Whatumanawa	4
Te Hinengaro	4
Te Ngākau.....	5
Te Pūmanawa.....	5
Te Puku o taku Tiki (Wāhanga rua): Ngā Kōrero Whakapapa:.....	6
Te Whakapapa Ira Tangata	7
Te whakapapa Wai.....	7
Te Whakapapa Kōwhaiwhai	9
Ngā ringaringa o taku Tiki (Wāhanga toru): Kaitoi Māori:	11
Te upoko o taku Tiki (Wāhanga whā): Te Matatau 2021: Te Koero Whakanao	16
Te Koero Whakanao	16
Te Roro o taku tiki (Wāhanga rima): Tāera	19
Orokohanga mai.....	19
Taku Tiki kōrero (Wāhanga Ono): Te Ira Tangata	22
Kupu Whakakapi	33
Bibliography	34

Rarangi Whakaahua

Whakaahua 1 Tenei au, tenei au (2006)	12
Whakaahua 2 Arohanui (2006)	12
Whakaahua 3 Te Pītau a Tiki	13
Whakaahua 4 Te Kura Awhitia te Nuku (2022)	14
Whakaahua 5 Te Kura Mātiti (2022)	14
Whakaahua 6 He Ata ki Runga, He Ata ki Raro (2020)	15
Whakaahua 7 Te Koero Whakanoa (2021)	16
Whakaahua 8 Te Koero Whakanoa (2021)	17
Whakaahua 9 Whakamātautau (2022)	19
Whakaahua 10 Whakamātautau: rewa tonu (2022)	20
Whakaahua 11 Whakamātautau: Kua rewa (2022)	20
Whakaahua 12 Mātai o Kimura (2022)	21
Whakaahua 13 Taura Hukihuki: Iho Matua (2022)	21
Whakaahua 14 Mātai o Kimura (2022)	21
Whakaahua 15 Kohinga mahi, Te Ira Tangata: I mua te whakatau (2022)	22
Whakaahua 16 Te Ira Tangata, Te Manawa (2022)	23

Kupu Whakataki:

Tōna Whakairatanga

“Ahakoa he iti

He iti mapihi pounamu.

He kākano i ruia mai i Rangiātea

E kore ia e ngaro.” (Kaupapa T. R., 2006)

Ko te tuhinga nei he ripoata mō tāku whakaaturanga toi Te Ira Tangata, i tū ki Te Manawa ki roto tonu o te rohe o Manawatū, ki te Papaiōea mai i te 18 o Whiringa-ā-rangi 2022 ki te 29 o Hānuere 2023.

Ko ngā whakataukī kei runga ake he whakataukī kua roa te Māori e whakamahia ana, otirā ka kite i roto i te wāhanga Te Ira Tangata o Te Aho Matua. Ko te whakataukī tuatahi, arā, “ahakoa he iti, he iti mapihi pounamu”, he whakanui i te whakakikokiko o te ohooho o tētahi mea pakupaku, pēnei ki te kōngahungahu kei te kōpū o te whaea. Ko te whakataukī tuarua, e rua ngā whakamarāma rerekē, heoi anō ko te whakamarāma e hono ana ki taku whakaaturanga ko te wāhanga e mea ana he kākano te tamaitiarā i heke mai ia i Rangiātea. Ko ngā whakataukī e tautoko ana i aku mahi toi, nā runga noa i te kaupapa, arā te ira tangata me tōna katoa. Ko tāku e wawata ana, ki a kite te tangata i ēnei whakataukī ki roto i aku mahi mō te tuhinga whakapae nei.

Ka huri ki taku tiki kōrero me ōna wāhanga. Ko te wāhanga tuatahi ko ngā waewae o taku tiki, arāarā tōna tūāpapa. I kōnei ka kōrerohia te orokohanga mai o Te Aho Matua, otirā ngā ariā ka kitea i te wāhanga Te Ira Tangata 1.1 o Te Aho Matua, te tūāpapa akoako o ngā Kura Kaupapa Māori.

Ko te wāhanga tuarua o taku tiki kōrero ko tōna puku, ka kite i te wāhanga nei ngā kōrero whakapapa, i ngā mōteatea whakapapa mō te Ira Tangata, Te Wai, Te Kōwhaiwhai me te Tiki anō hoki. I kōnei kitea te whakapapa, te hononga i waenganui i ēnei mea kua noho hei rawa, hei toi, hei kaupapa mōku.

Ko te wāhanga tuatoru ko ngā ringaringa o toku tiki, ko ngā ringa nei e kawē ana i ngā kōrero mō ngā ringa toi i noho hei tauira mōku, waihoki aku mahi toi mō te tuhinga whakapae nei. Ko te ringa toi tuatahi ko Kura Te Waru Rewari me ōna pukenga peita, otirā tōna whakatakoto me tōna

paparanga i te kōwhaiwhai ki āna mahi. Ko te ringa toi tuarua ko Ngātaiharuru Taepa me āna mahi kōwhaiwhai otirā āna tikanga kowhiri tae me te whakarite kōwhaiwhai hoki.

Ko te wāhanga tuawhā o taku tiki kōrero ko te upoko. Ka korerohia tēnei wāhanga mō aku mahi nō te whakaaturanga toi Te Matatau 2021, arā ‘Te Koero Whakanoa’. Ka kite hoki i te wāhanga nei he hokaitanga mō te taha whakaharatau, te taha tāera hoki.

Ā hei whakakapi, ko te wāhanga whakamutunga mō te tuhinga whakapae nei ko Taku tiki kōrero. Ko taku tiki ka kōrero mō te whakaaturanga toi mō te tuhinga whakapae nei, arā Matatau 2022 Te Ira Tangata . I kōnei ka kite i te tino mahurangi o te tangata mai i tōna whakairatanga ki tōna whānautanga mai. Ka kite hoki i tētahi o ngā tirohanga mai i te tamaiti Aho Matua.

Ngā waewae o taku tiki (Wāhanga Tahī): Te Aho Matua

Kōrero whakataki:

Ka huri ki te wāhanga tuatahi o taku tiki kōrero, arā ki ōna waewae. E rua ngā whiti kei te wāhanga nei. Ko te tikanga o te whiti tutahi, hōkaitanga i te orokohanga mai o Te Aho Mataua, otirā te whiti 1.1 Te Ira Tangata me ōna kōrero.

Ko te whiti tuarua e kawē ana i ngā kōrero nā Kui Kāterina mō tēnā ariā, me tēnā ariā kei te 1.1 Te Ira Tangata, arā, te Wairua, te Mauri, te Iho Matua, te Ihi me te Tapu, Te Mana me te Wehi, te Whatumanawa, te Hinengaro, te Ngākau, ā hei whakakapi ko te Pūmanawa anō hoki.

Ko tāku mō te wāhanga nei ki a whai marāmatanga ki tēnei mea Te Aho Mataua, otirā ki te tūāpapa o aku mahi toi mō te tuinga whakapae nei.

Te Aho Matua

Ko Te Aho Matua te tūāpapa o ngā kura kaupapa Māori. Ko te tikanga o Te Aho Matua, he arāhi, he tautoko i te hunga kaiako, me ngā whānau ki te whakatipu i ngā tamariki i raro i ngā tikanga Māori, me te reo Māori, otirā he poipoi i te ao Māori o te tamaiti hoki. E ai ki ngā kōrero, “i a Kāterina Te Heikōkō Mataira rātau ko Tuki Nepe, me Cathy Dewes te mahi whakakapi i ngā tino whakaaro o te rōpū me te hanga mātāpono mō tēnei mea te Kura Kaupapa Māori.” (Tocker, 2019) Heoi anō nā Kāterina i whakawhānui i ngā whakaaro o Cathy rāua ko Tuki, nā runga i tōna “wānanga ki te wāhi ngaro i puta mai ai.” (Tocker, 2019)

E ono ngā wāhanga o Te Aho Matua hei whāinga mō ngā Kura Kaupapa. Ā ko ngā wāhanga nei ko Te Ira Tangata, ko Ngā Iwi, ko Te Reo, ko Te Ao, ko Ngā Āhuatanga Ako, ko Ngā Tino Uaratanga anō hoki. Ko te tikanga o ēnei wāhanga he whakarauora i te reo Māori me ngā tikanga Māori, otirā kei ngā wāhanga nei ngā mātāpono hei tautoko i ngā mahi arāhi o ngā whānau nō ngā Kura Kaupapa Māori

Ko te wāhanga e whai wāhi ana ki aku mahi mō te tuinga whakapae nei ko te wāhanga 1.1 Te Ira Tangata, arā e kīa ana “No ngā Rangī Tuhāhā te wairua o te tangata. I tōna whakairatanga ka hono te wairua me te tinana o te tangata. I tera wa tonu ka tau tona mauri, tona tapu, tona wehi, tona iho matua, tona mana, tona ihi, tona whatumanawa, tona hinengaro, tona auahatanga, tona ngākau, tona

pumanawa. Na ka tupu ngatahi te wairua me te tinana i roto i te kopu o te whaea, whanau noa”
(Aotearoa T. R., Kāhore he rā)

Ko te whiti tuarua o te wāhanga nei, ka kōrerohia mō ngā ariā, otirā he tirohanga ki Te Tuakiri o te Tangata, nā Katerina Te Heikōkō Mataira. I kōnei ka whakamarāma i ngā ariā kei te wāhanga 1.1 Te Ira Tangata kei Te Aho Matua: (Mataira, 2000)

“Te Wairua

“Mai i rā anō te whakaponu o ngā tīpuna ki te wairua o te tangata, otirā ki te wairua o ngā mea katoa. Koia pea tēnei Te kākano i ruia mai i Rangīātea; ko te wairua tonu o te tamaiti me te wairua hoki o ngā mea katoa, mai te rangi kei te whenua.

Te Mauri

Koia tēnei taua ngao e puta ai te tamaiti ki te ao Marāma, e whai ora ai.

Te Iho Matua

Koia tēnei te iho e here nei i te tamaiti ki ōna mātua, ōna tīpuna, hoki atu, hoki atu ki a Io Matua tonu.

Te Ihi me te Tapu

Koia tēnei taua āhua o Io Matua tonu i tākohatia mai e ia i te īrikohanga o ngā mea katoa; me tērā o ngā tīpuna i heke iho mai ki te tamaiti i runga i tōna taura tangata.

Te Mana me te Wehi

Nā runga hoki o te āhua o mua atu nei, arā, te ihi me te tapu, ka muramura mai te mana me te wehi. Ko te āhua tonu tēnei o te ihi me te tapu ka rangona i te tuakiri o te tangata. Kei te katoa tēnei tūāhua engari, mō te pakeke, ka piki ka heke rānei tēnei tūāhua i runga i ngā mahi a taua tangata.

Te Whatumanawa

Kei konei te hōhonutanga o ngā āhua katoa kua pā atu ki te wairua e taea ai te whakaputa i te tinana, te hoki ki ngā rangi, te kōrero ki a rātau kei tua i te arāi, te tiki atu i ngā mahara o tuawhakarere, te mata kite, he aha atu, he aha atu. Kei konei hoki te puna mahara.

Te Hinengaro

Kei te hinengaro ngā whakahaere katoa mō te noho i te ao kikokiko nei. Kei a ia ngā whakarite me ngā whakatau. Māna e huaki, e kati rānei ngā tatau o te ako.

Te Ngākau

Ko te ngākau te mata o te wairua e kitea ai tōna āhua, mehemea kei te koakoa, kei te pōuri, kei te raru, kei te aha rānei.

Te Pūmanawa

Kei konei e noho ana ngā taonga o te tamaiti, ērā i uhia ki runga i a ia e Io Matua tonu; ērā i heke iho mai i ōna mātua tūpuna ki a ia.” (Aotearoa T. R., Kāhore he rā)

Te Puku o taku Tiki (Wāhanga rua): Ngā Kōrero Whakapapa:

Kupu Whakataki:

Ko te puku o taku tiki e kawē ana i ngā whakapapa e hāngai ana ki aku mahi mō te tuhinga whakapae nei. Ko te whakapapa e tūhono ai te tangata ki ōna tipuna, ki ōna tamariki, ki ōna mokopuna, ā, ka haere tōnu. Heoi anō ko te whakapapa e tūhono ai tātau te tangata, ngā toi, ngā mea o te whenua, ngā mea o te rangi, waihoki ki a Ranginui rāua ko Papatūānuku hoki. He nui ngā tikanga e tuku ai i te whakapapa, mā ngā kōrero tuku iho, ngā waiata, ngā mōteatea, te kōwhaiwhai, ā ka haere tonu ngā huarahi e kawē ai i te whakapapa.

Ko ngā mōteatea, me ngā kōrero whakaheke kei te tuhinga whakapae nei, e kawē ana i te whakapapa Ira Tangata, te whakapapa wai, te whakapapa kōwhaiwhai me te whakapapa o te tiki anō hoki.

Ko te tikanga o te wāhanga nei he titiro ki te taha whakapapa o taku kaupapa mō te tuhinga whakapae nei, otirā he whakaatu i te tūhonotanga i waenganui i tōku kaupapa mahi, ki ngā rawa, ki nga tini āhua hoki. Ko te mōteatea tuatahi ko te whakapapa Ira Tangata.

Te Whakapapa Ira Tangata

Ka noho tahi...

A Ranginui rāua ko Papatūanuku

Ka puta ko Tane Mahuta

Ka pokepoke ai e ia ngā one i Kurawaka

Kapu ko Hine Ahu One

Tane Mahuta...

Ka noho ki a Hine Ahu One

Ka puta ko Hine Titama

Ka noho ki a Tane Mahuta

Ka huri ki a Hine Nui Te Po. (Tamariki, Te Whakapapa Ira Tangata, 1990s)

Ko te whakapapa nei e kawe ana i te kōrero mō te orokohanga mai o te ira tangata. Ko te tikanga o te whakapapa nei he tirohanga ki te whakairatanga o te tangata tuatahi, otirā he whakaatu i te whakapapa o te tangata me tōna hononga ki ngā atua.

Te whakapapa Wai

Ka nohotahi...

A Ranginui rāua ko Papatūanuku

Ka puta ko Tane Mahuta

Ka noho ki a Hine Tuamaunga

Ka puta ko te Pūtoto, ko Tua Matua, ko Parawhenuamea

Ko te Pūtoto...

Ka noho ki a Takaaho

Ka puta ko Pukupuku, ko Mokohuruhuru, ko Torohū, ko Torotorohuka

Takotowai...

Ka noho ki a Tuamatua

Ka puta ko Rakahore ka noho ki a Hine Māukuuku

Ka puta ko te kohatu, ko te haupapa

Rakahore...

Ka noho ki a Hinewaipipi

Ka puta ko te wai o te whenua

Parewhenuamea...

Ka noho ki a kiwa nāna ko te wai, nāna i hika mai a i te wai, koia i pupū mai ai te wai ka takoto hei moana. (Tamariki, Te Whakapapa Wai, 1900s)

Ko te whakapapa Wai he rite tonu ki te whakapapa Ira Tangata, arā ka kite i te hononga o te wai ki te tangata, otirā ki a Ranginui rāua ko Papatuānuku. Heoi anō ko te tino tikanga o te whakapapa Wai mō te tuinga whakapae nei ko te taha ki te rawa, arā ko te whakamahinga o te wai, hei whakahohe i te waikano otirā te waikahu. Heoi anō tērā tētahi kōrero i rongō i au e tamariki ana, i te pokepoke o Hine-Ahu-One ka whakatō a Tangaroa i te wai ki a ia, me taku whakapono he hononga tēnei ki te waikahu.

Ka huri ki te whakapapa Kōwhaiwhai, ko te whakapapa nei nā Potaka Taite i tuku iho ki ōna taurira, ā nā Israel Tangaroa Birch i toha mai ki ahau.

Te Whakapapa Kōwhaiwhai

Io

|

Te Po

|

Ngā Rangi Tūhaha

|

Ranginui – Papatuānuku

|

Te Ao Marāma

|

Uru Te Ngangana

|

Roiho

|

Roake

|

Haepuru

|

Haemata

|

Whero Te Tipua

|

Tawhirimatea

|

Tangaroa (Whakairo)

E ai ki ngā kōrero i kake ake te tamaiti tuaono o Ranginui, rāua ko Papatuānuku ki ngā rangi tūhāhā ki te rapu i te toi e kīia nei ko te whakairo. Ka piri atu e rua o ōna tuākana, a Haemata rāua ko Haepuru ki a ia hei hoa haerere mōna. I tō ratou taenga atu ki Ngā rangi tūhāhā, i tae te kōrero ki a ia

kua tae kē tōna teina a Tangaroa ki te tiki i te toi whakairo. Nā te rironga o te whakairo ki a Tangaroa, ka riro ko te toi e kiā nei ko te kōwhaiwhai ki a Whiro. (Birch, 2006, 2018)
Kei te kōwhaiwhai he wāhanga nui ki aku mahi mō te tuhinga whakapae nei.

Ko te whakapapa hei whakakapi i tēnei wāhanga ko te whakapapa Tiki, Nā he nui ngā kōrero whakapapa mō te tiki, ēnagri ko ngā kōrero e whai ake nei he kōrero tuhu iho mai i a Koro Napa Otimi.

Ko ngā kōrero nei kua kawea mai tawhiti, arā, mai Hawaiki, Tahiti, Hawaii, Rapanui anō hoki. Kei te kawē tonu rātau i te whakapapa nunui, whakapapa roroa mō te tiki. Heoi koinei noa he wāhanga o tērā kōrero. “Ka ahu mai te tiki i Tikitiki-o-Rangi, arā ko Tikiāhua, te ira wahine, ā ko Tikiapua te ira Tāne. Nō Tikitiki o Rangi, nā wai rā ka heke ki a Tikiāhua, ki a Tikiapua, ā ka hua mai ko Tiki” (Otimi, 2022)

Ko te tikanga matua o ngā kōrero whakapapa nei, he marama ki te orokohanga mai o Te Aho Matua, otirā ngā hanganga ka kitea i te kohinga mahi mō te tuhinga whakapae nei. Hei tapiri ka kite i te tūhonotanga i waenanui i te kaupapa kōrero ki ngā rawa, ngā rawa ki te kohinga mahi *Te Ira Tangata*.

Hei tapiri ake, he ruarua ngā kōrero rerekē hei tauawhi i taku kaupapa mahi, hēoi anō ko tāku i te tuhinga whakapae nei he whakawhānui i te kaupapa nei.

Ngā ringaringa o taku Tiki (Wāhanga toru): Kaitoi Māori:

Kupu Arataki:

Ko ngā ringaringa o tōku tiki e mau ana i ngā kōrero mo ngā kaitoi Māori i noho hei tauira mō aku mahi toi mō te tuhinga whakapae nei. E rua ngā kaitoi i whāia e au hei tauira mahi māku, arā ko te ringatoi tuatahi ko Kura Te Waru Rewiri, me ōna pukenga peita, otirā ngā paparanga i te kōwhaiwhai ki roto i tāna mahi *Tenei au, tenei au* 2006. Ko te ringatoi tuarua ko Ngātaiharuru Taeapa, me ōna pukenga kōwhaiwhai, otirā ngā tikanga whakarite tae mō āna mahi.

Ko te tikanga o te wāhanga nei, he whakaatu i ngā mahi, otirā ngā kaitoi i whai wāhi ki te whakairotanga o aku mahi toi.

Ngā Kaitoi Māori:

Ko *Tenei au, tenei au* (whakaahua 1). He mahi nā Kura Te Waru Rewiri i waihanga i te tau 2006. Nā ahakoa kāore a Te Waru-Rewiri i tipu ake i waenganui i ngā āhuatanga whakarite kōwhaiwhai, waihoki kāore ia i kaha kite i ngā hanga kōwhaiwhai ki ōna marae, i marāma tonu a Te Waru-Rewiri ki te tino uaratanga o te kōwhaiwhai ki te ao Māori, otirā ngā toi Māori. I mua i te waihanga o Te Waru-Rewiri i *Tenei au, tenei au*, “i te pae o whakaaro ngā mahi kōwhaiwhai, heoi anō ko tāna i hiahia ki a noho ko te kōwhaiwhai me tōna kotahi, arā, ki a kite i te kōwhaiwhai i waho tonu i te wharenuī, otirā ki a kite hoki i te hononga i waenganui i te kōwhaiwhai me Te Waonui a Tāne.” (Rewiri, Five Māori Painters, 2014)



Whakaahua 1 Tenei au, tenei au (2006)



Whakaahua 2 Arohanui (2006)

“Ko te tikanga o *Tenei au, tenei au*, he tohu aroha ki tāku teina a Miriama. I tapainangia e ia whaimuri i tō māua Kuia, a Kui Miriama Teiti nō Kauwhata Marae. He tino tangata a Miriama, otirā i nui hoki ōna pukenga, heoi anō ko te taka kai tōna tino pukenga.” (Rewiri, *Tēnei au, Tēnei au*, 2023) Engari i te tau 2006 i hinga atu a Miriama i te mate pukupuku. Nā tēnei i hua mai ko *Tēnei au, tēnei au* me *Arohanui* (*whakaahua 2*). Ko te wawata o Te Waru-Rewiri mō ngā mahi nei he whakatinana, he whakanui i tōna teina, waihoki i ōna pukenga maha. Ko ngā tae i kowhirihia nā runga noa te rata ki a Miriama, heoi anō ko te māwhero ka kite i *Arohanui* te tino tae o Miriama.

I te tirohanga atu ki *Tēnei au, tēnei au* ko ngā āhuatanga tuatahi ka kite i te peita tūrehurehu nei, ko te kōwhaiwhai me ōna tini paparanga. I tino rata ki au tēnei mahi, nā runga noa i tōna rerekē ki ngā mahi kōwhaiwhai māori noa, otirā mōku anō he rite tonu te mahi nei ki te whakapapa, arā, ko ngā whakapapa, ngā mātāpono, te whānau, te pepeha, ā ka haere tonu ēnei momo āhuatanga i hangaia ai i te tuakiri o te tangata. Ka kite i te whakapapa i roto tonu i ngā paparanga maha o te kōwhaiwhai. Ko

ngā tae rerekē, ka whakawehewehe i ngā paparanga, ki a māmā tonu te kite i tēnā wāhanga, i tēnā wāhanga o te kōwhaiwhai.

Ka huri ki te ringa tuarua o taku tiki kōrero, arā ki ngā mahi a Ngātaiharuru Taepa. Nā ahakoa he nui ōna mahi i noho hei tauira mahi māku, ko ngā mahi i tino tautoko i au mō aku mahi mō te tuinga whakapae nei. Ko *Te Pītau a Tiki* (whakaahua 3), otirā tāna kohinga mahi *Te Kura* (whakaahua 4) me *He Ata ki Runga* (Whakaahua 5), *He Ata ki Raro* (whakaahua 6) anō hoki.

I te tau 2017 i whai wāhi ahau ki te taha o Taepa, ā nāna i whakaatu mai tōna rautaki whakatakato, waihanganga i te kōwhaiwhai. Arā, “ka tīmata ki te manawa o te kōwhaiwhai, ā mā te manawa ka puta atu ki ōna peka koru. Ka tukuna ki a rere te pena, ā mā te rongu koe e arahi. Ka āta tapirihia i ngā pītau, i te mangopara, ā ka haere tonu tae rawa kua ngata te hiahia.” (Taepa N. , 2017)

I te tīmatanga o āku mahi rangahau, i tirohia *Te Pītau a Tiki*, nā runga noa i te whakamahinga o te pītau me te hanga o te tiki ki a kotahi nei te hanga. Heoi i taku wananga taha o Taepa, I whakamarāmamai ia “ko *Te Pītau a Tiki* i waihanganga i te whānautanga mai o Maungapohatu, tāna mātāmua. Ka kitea he tiki e toro whakaterunga ana, ko te hanga nei i kapohia mai i ngā mahi o Maungapohatu i a ia e pēpi ana.” Nā te hanga, me te tikanga o *Te Pītau a Tiki*, i wawe tāna noho hei tauira mahi māku. Ko te painga o te mahi nei, ahakoa he nui ngā pītau, ka marama te kite i tōna hanga.



Whakaahua 3 *Te Pītau a Tiki*

Ko te mahi tuarua he kōhinga mahi, arā ko *Te Kura*, i tēnei tau tonu i whai wāhi ahau ki te tautoko i a Ngātai Taepa me te kohinga mahi *Te Kura*. Ko *Te Kura Awhitia te Nuku* (Whakaahua 4) me *Te Kura Matiti* (Whakaahua 5).



Whakaahua 4 Te Kura Awhitia te Nuku (2022)

Ko *Te Kura Awhitia te Nuku*, tētahi o āku tino mahi nō te kahui mahi nei, ko tōna āhua he rite tonu ki te rau, ki tētahi tipu rānei. Ko te rere o te koru, te nohonga o te pītau ka tino tau te rongo i te tirohanga atu. Otirā ko ōna tae, arā te nohonga tahi o te kikorangi me te parauri he ahua rerekē ka pā mai ki wairua. Nā ko ngā tae nei he rite tonu ki a Rangunui rāua ko Papatuānuku anō hoki.



Whakaahua 5 Te Kura Mātiti (2022)

Ko te mahi tuarua nō te kāhui mahi nei ko *Te Kura Mātiti*. I te kāhui nei he tino nui ngā tae rerekē, ngā tae ohoho, ngā tae e tau ai te ngākau anō hoki. Ko *Te Kura Mātiti* tērā e whakaohoho ana i te tangata i te tirohanga atu. Ko te rautaki o Taepa ki te kowhiri tae, “he titiro ki te taiao, ki ngā kararehe, ki ngā ngarāra, waihoki i ōna wā ngā kakahu ka mau te tangata.

Ko tā Taepa i tētahi uiui mō ngā mahi nei ki te taha o *Art Collector Magazine*, “Ko tētahi atu kupu mō te kōwhaiwhai ko te tuhituhi... arā ko te kōwhaiwhai te reo tuhituhi o ngā tipuna.” (Taepa N. , 2022)

Ko te mahi whakamutunga ko *He Ata ki Runga, He Ata ki Raro*, ko tōna tikanga, he kawē i ngā ariā o te karakia, te wānanga, otirā ngā kaupapa e whai ana i te akoranga i te tipuranga waihoki te mātauranga. Koinei tētahi o ngā mahi nunui kua whakarite e ia, otirā rite tonu ki te mātauranga, he nui ōna peka, me ōna wāhanga. Rite tonu ki te tangata ko ētahi wāhanga he iti, ā ko ētahi he rahi, arāarā te tangata ko ētahi kei te ako tonu, ā ko ētahi e mau ana i te mātauranga.



Whakaahua 6 He Ata ki Runga, He Ata ki Raro (2020)

Nā i te tīmatanga kāore ahau i kaha aro ki te mahi nei, engari ka kite i te tuhinga nei, ko ngā wāhanga kei tēnā, kei tēnā o aku mahi, kua kapohia mai *He Ata ki Runga, He Ata ki raro*. Heoi anō ehara i te mea koira tāku i whai ai i te tīmatanga o aku mahi, engari nā taku noho tahi ki te tauira hukihuki o *He Ata ki Runga, He Ata ki Raro*, me kī i whai wāhi māua ki te wānanga, mō ōna tini wāhanga i ngā wā i uaua te rere o aku mahi mō te tuhinga whakapae nei.

Te upoko o taku Tiki (Wānanga whā): Te Matatau 2021: Te Koero Whakanao

Kupu Whakataki:


Ko te Upoko o tāku tiki kōrero, e mau ana i ngā kōrero mō tāku kāhui mahi *Te Koero Whakanao* i whakairia mō tāku tau tuatahi mō MMVA. I tū te mahi nei ki te whakaaturanga toi Te Matatau 2021 ki Te Manawa, ki roto tonu o te Papaioea. Ko ngā mahi nō *Te Koero Whakanao* te tīmatanga o āku mahi mō te tuhinga whakapae nei, arā Te Ira Tangata.

Te Koero Whakanao

He kohinga mahi tēnei i whakaritea e au mō te tau tutahi o MMVA. E waru ngā mahi waikano (Whakaahua 7) kei te kāhui nei, ā, kōtahi te ripene ataata (Whakaahua 8). Ko ngā peita waikano, peita tangata, kua irihia me ētahi pini iti ki runga i te pakitara o te whare. E rua ngā rahi rerekē, arā, ko te A3 me te 56x76cm anō hoki. Ko te ripene ataata kua tukuna ki runga i tētahi pouaka whakaata 50 īnihi te rahi, hei tapiri ake ki tēnei ko te pouaka whakaata i whakatakotohia ki roto i tētahi momo tēpu ki a wawe te takato o te pouaka whakaata ki runga i te papa. Ko te ripene hei whakaatu i te tio e rewa ana ki runga i te pepa waikano, ko tēnei e hono ana ki ngā tikanga whakanao me te wai, ā ko ngā mahi peita he waihotanga nā te tio kua rewa.



Whakaahua 7 Te Koero Whakanao (2021)



Whakaahua 8 Te Koero Whakanoa (2021)

Ko te waihanga o ēnei mahi, i tīmata me te peita waikano, me te wai Māori. I whakaranu ahau i ngā mea e rua nei, kātahi ahau ka maringi i te wai ki rō hangarewa kōaro tiki. I kōnei i tuku i te hangarewa ki te pouaka tio, ki a tio te wai. Hei te wā kua tio te wai, ka tukuna ngā tiki tio ki runga ake i te pepa waikano, ā ka tukuna ki a rewa, ki a rere te wai, otirā ki a waihanga te wai i tōna ake ara ki runga i te pepa. Mō te taha ki te ripine, he rite tonu te tikanga whakarite, heoi anō nā ngā kaimahi o Te Manawa ahau i tautoko ki te rikoata i te tio e rewa ana, ara i whakairi i te kamera ki runga ake i te tēpu, hei ripene i ngā tio e rewa ana. Mā tēnei ka tutuki ki a rite tonu ki te mataki i te tio pono e rewa ana.

Mōku anō, e rua ngā momo toi ka kitea i roto i ēnei mahi, arā ko te momo toi tuatahi ko te toi tangata, arā koinei te wāhanga o te hanga tiki ka kitea, engari anō, nā ngā tae me te kākano o te peita ka whakaaro hoki ahau ki te toi tūrehurehu. Nā i whakawehe i ngā mahi nei ki a rua ngā puna, arā ka kitea te (Whakaahua 7) he peita waikano anake. Ko taku tino hiahia ki a kite te tanagta i te rerekē o tēnā mahi, o tēnā mahi, otirā te rerekē o te rere o te wai. Ko ēnei rerekētanga, arā ngā tae e whakaatu

ana i te rerekē o ngā taumahatanga ka utaina ki te tangata, otirā ngā āhuatanga tapu anō hoki. Heoi anō i kowhirihiā i ngā tae kitakita hei hononga ki taku ake huarahi whakamahu.

Ko te rere o te wai, he whakatinana i ngā tikanga whakanoa, whakawātea rerekē, arā mō ngā mahi nei ko te wai te aronga matua, ēngari ehara i te mea ko te wai anake hei whakanoa, ēngari anō te kai, te ahi ā ki ētahi te wahine anō hoki. Hei tapiri ki tēnei ko te rere o te wai he rite ki ngā mahi whakanoa, arā ka māturuturu i te wai ki runga i tētahi mea, ki te tangata rānei. Ko te wai ka rere, hei whakawātea, hei hiki, i te tapu, i ngā āhuatanga taumaha hoki.

Ko te Whakaahua 8 he mahi kotahi tēnei, arā kei raro ko te ripene o te tio e rewa ana, ki a kite i te rewa, me te rere o te wai, arā kei runga ake, kei te pakitara ko te huanga mai o te rewa. Hei tāpiri ko te mahi nei he tūhonotanga ki ōku tungāne me tō mātau whakatipuranga i roto i ngā mahi whakanoa me te wai. Ko te tae kākārīki e hāngai ana ki ngā taonga i whakamahia i te wā o te whakanoa, o te whakawātea, otirā ko ngā tiki e toru kei te mahi nei, ko mātau ko aku tungāne. Ko ngā hanga tiki nei, e tohu ana i te ira tangata, heoi anō ko ō rātau āhua he kōngahungahu kei te kōpū o te whaea.

Ko te ingoa *Te Koero Whakanoa* nā maua ko Karangawai Marsh i whakatau hei ingoa mō ngā mahi nei, arā ko te tikanga o te kupu koero, ko te rewa o te tio o te hukarere rānei, hēoi anō ko tētahi atu tikanga o te koero ko te māuiui kā rāngona i te wā o te ikura. Ko te whakanoa he tikanga e hiki ai i te tapu i tētahi mea i te tangata rānei.

Ko tāku i hiahia mō ngā mahi nei, he whakaatu i te tino uaratanga o te Wai Māori ki te ao Māori, ki te huanga Māori, otirā te ira tangata hoki. E wawata ana mā te toha i ēnei kōrero, otirā ngā tikanga whakanoa, ka whai māramatanga te tangata ki te mahurangi o te wai, nā ahakoa tōna rite ki ngā mahi o te hāhi, arā ki ngā mahi iriiri, ko te rerekē i waenganui i te whakairiiri me te whakanoa, arā, ko te whakairiiri kei raro tonu i tētahi whakapono, ā ko te whakanoa he mea e hiki ai i te tapu, he whakawātea anō hoki.

Te Roro o taku tiki (Wāhanga rima): Tāera

Kupu Whakataki:

Ko te tikang o tēnei whiti, he titiro ki te taha waihanga o aku mahi mō te tuinga whakapae nei. Ka kitea i kōnei te taha whakamātautau, aku mahi wananga, waihoki te huarahi i whaia e au hei waihanga i ngā mahi mō te kohinga *Te Ira Tangata*.

Orokohanga mai

Ko tāku hiahia i te tīmatanga o ngā mahi nei, he whakawhānui i āku mahi mō Te Koero Whakanoa, otirā te kaupapa whakanoa. Heoi anō nā runga i taku haputanga, i āta huri taku aroaro ki Te Aho Matua, otirā te whakairatanga o te tamaiti. Nā ahakoa tēnei, i kite tonu ahau i te hononga i waenganui i ngā mahi nō *Te Koero Whakanoa*, ki tāku haputanga, arā ko te hononga matua ko te tiki, arā anō ngā tikanga rerekē o te hei tiki, engari ko te kōrero e mohio nei au ko te tiki, e tohu ana i te tamaiti arā, te kōngahungahu ka tipu i te kōpū o te whaea. “I ōna wā i mau te ira wahine i te tiki hei tohu ataahua mō te matahua, waihoki ki a rere pai te whakawhānau tamaiti. Nā ko te tikanga nei he hononga ki a Hine-te-iwaiwa, arā, te atua o te whakawhānau, ā ko ia hoki te kaitiaki o te tiki tuatahi.” (Austin) Nā ēnei hononga i tīmata aku mahi whakamātautau.



Whakaahua 9 Whakamātautau (2022)

Ko taku mahi tuatahi, i wkamātau me ngā tio i mahue mai *Te Koero Whakanoa* (Whakaahua 9). I te tīmatanga o ēnei mahi, i hiahia ahau ki te whakamātautau i ngā rautaki rerekē ki a wawe te rere o te wai, waihoki te kite ina e ahei ana te whakarite i tētahi mōmo āhua. Ka kitea i te whakaahua 9 kua whakawehe ahau ki a whā ngā wāhanga, arā i konei i whakaharatau ahau ki a whā ngā ara rerekē, arā ko te tiki kōwhai he rite tonu te rautaki ki tērā o *Te Koero Whakanoa*, ko te tiki kākariki i whakarite ahau i tētahi arā poutama, ki a whai te rere o te wai i te rewanga o te tio. Ko ngā tiki karaka he āhua rite te rautaki, engari ko te tiki karaka kei runga ake, kua āhua māku te pepa, ā ko tērā atu tiki karaka i māturuturu i te wai. I roto i ēnei mahi whakamātautau i

tino kaha taku hoki atu ki te tiki kākāriki.

Nā ngā poutama i tipu te hiahia ki te whakamātautau i te kōwhaiwhai. Ko tāku mō te mahi kei te whakaahua 10 he rite tonu ki tērā o te whakaahua 9 heoi anō, ko te tio nei kua hangaia i ngā hua nō te marā, otirā i te wai me te hinu orewa. Ka kitea i te whakaahua 11 kua rewa katoa te tio, otirā nā te hinu, i pūataata ngā whanga o te pepa i pāngia ki te wai hinu. Ahakoa taku tino rata ki tōna otinga, i uaua te whakarite i tētahi momo penei anō. Nā te nui o te hinu, te iti o te wai, te raru rānei o ngā tae, kāore taku hiahia i tutuki. Nā ahakoa tēnei i whai wā ahau ki te whakaaro mō te taha rawa, ki a māmā anō māku, otirā ki a rite te ia o ngā mahi anō hoki.

I te wāhanga tutahi ki te tuarua o taku haputanga i kaha tonu taku whakamātautau, me te waikano. Otirā i tino ū ahau ki ngā hanga kōwhaiwhai me te tiki. Mōku anō i tino hono ēnei āhua ki taku kaupapa mahi. Arā ko te kōwhaiwhai, he nui tonu ōna tikanga, hēoi anō nā runga i te āhua, tōna whakatakoto he rite tonu ki te whenua kei te kōpū o te whaea, waihoki i kitea he hononga ki ngā kōrero kei Te Aho Matua mō ngā āria rerekē ka tō ki te tamaiti. Ko te tiki e hono ana ki te kōngahungahu, otirā ki te ira wahine. Ko te whakaahua 12 te mahi tuatahi i waihangahia, otirā i noho tēnei hei tauira hukihuki mō aku mahi mō te tuhinga whakapae nei.



Whakaahua 10 Whakamātautau: rewa tonu (2022)



Whakaahua 11 Whakamātautau: Kua rewa (2022)



Whakaahua 13 Taira Hukihuki: Iho Matua (2022)

I roto i ngā mahi whakarite i kaha taku whakamahi i te hanga o ngā tiki a ōku mātua, heoi anō i tino hiahia ahau te whakatinana i taku tama i roto i ngā mahi, arā i whai whakaaro ahau ki te whakauru i ngā āhua ka kitea i ōna mātai.

Ko te whakaahua 13 me te Whakaahua 14 ētahi o ngā tini mātai i whakamahia mō aku mahi kei te tuhinga whakapae nei. Nā tēnei i tino kite ahau i te hononga i waenganui i te kaupapa me ngā mahi toi. Otirā te hononga o tāku haputang ki taku kaupapa mahi.

Nā ko tāku me ngā mātai nei he whakamahi i tōna āhua, ka kitea i te kohinga mahi *Te Ira Tangata*, kua takahuri, kua paku neke tōna nohonga ki a wawe tōna noho i roto i te tauawhitanga o ngā kōwhaiwhai.

Pacific Radiology



Pacific Radiology



Whakaahua 12 Mātai o Kimura (2022)

Pacific Radiology



Pacific Radiology



Whakaahua 14 Mātai o Kimura (2022)

Taku Tiki kōrero (Wānanga Ono): Te Ira Tangata

Kupu Whakataki:

Ko te tikanga o tēnei wāhanga ko te whakaaturanga mō te tuinga whakapae nei. Ko te whiti tuatahi o te wāhanga nei, he kōrero mō te whakatakotoranga me ngā mahi whakarite mō te whakaaturanga ki te Whare o Te Manawa. Hei whakakapi i te wāhanga nei ka āta kōrerohia ngā mahi kei te kohinga mahi nei, me tō rātau hononga ki ngā āria rerekē kei Te Aho Matua, otirā āku wheako i au e hanganga ana i ngā mahi.


Te Manawa

Ko taku hiahia i te tīmatanga o ngā mahi nei, he whakarite i tētahi mahi mō ia āria kei Te Aho Matua, engari kāore tērā hiahia i tutuki, nā runga noa i ētahi o ngā mahi kāore i mutu, kāore rānei i whai hononga ki taku kaupapa. Ahakoa tēnei i kitea i roto i ētahi mahi e rua ngā āria, nā reira ahakoa kāore i tutuki ki a 11 ngā mahi, ka kitea tonutia ki a 11 ngā āria. Ka kitea i te whakaahua 15 te kohinga mahi i mua i te whakatau ko ehia mahi hei whakaatu. Nā ahakoa taku hiahia ki te whakaatu i ngā mahi katoa, i kitea ko tētahi i kanukanu, kāore rānei te ia o te mahi i rere ki te taha o te kāhui mahi.



Nā te tino hiahia ki wawe te rere o ngā mahi, i kōwhiriahia ki a 8 ngā mahi, hei whakaatu ki te whakaaturangatoi. Ko te (whakaahua 16) te whakataunga whakamutunga, otirā ka kitea i te whakaahua nei kua iri ki runga ake i te pakitara ki Te Manawa. Nā ahakoa te kōunga o ngā mahi whakairi nō te kohinga *Te Koero Whakanoa*, i uaua te whakairi i ngā mahi *Te Ira Tangata* mā ngā pini iti. Nā reira i huri ki ngā aukume hei whakairi i ngā mahi ki te pakitara. Ahakoa i whakatau ko ngā aukume iti hei whakairi, kāore hoki ēra i pupuri i te mahi, nā reira i huri ki ngā aukume nui.

Whakaahua 15 Kohinga mahi, *Te Ira Tangata: I mua te whakatau* (2022)



Whakaahua 16 Te Ira Tangata, Te Manawa (2022)

I roto i ngā mahi whakatakoto o ngā mahi *Te Ira Tangata*, i whai whakaaro ahau ki ngā hanga, otirā te nohonga o ngā mahi. Nā i tino hia ahau te whakaatu i te whakapapa i roto i te whakatakotoranga, arā rite tonu ki te pāharakeke. Ka kitea ko ngā tiki kei runga ake, kei ngā tahataha, koinei ngā tiki e hono ana ki ngā tipuna, ki ōku mātua, otirā ki a māua ko tōku tane. Ko ngā hanga kōngahungahu kei waenganui, waihoki kei raro hoki, he hononga tēnei ki taku tama, otirā ki ngā uri whakaheke. Nā i roto i ngā mahi whakatakoto, i kite, i mahi ngātahi ngā tae anō hoki. Nā ēnei ahuatanga i whakatau koinei hei whakatakotoranga mō ngā mahi nei.

Te Ira Tangata

Ko te ingoa *Te Ira Tangata*, i kapohia mai i te wāhanga 1.1 Te Ira Tangata nō Te Aho Matua. Ko te wāhanga nei o Te Aho Matua, i noho hei tūāpapa mō āku mahi, arā hoki hei kaupapa mō ngā mahi kei te tuinga whakapae nei. Ko te ira tangata, ko tātau te tangata, heoi anō he ira tane, he ira wahine, he ira atua anō hoki. Nā ahakoa he rerekē ēnei ira, ko te kupu ira e tūhono ai tātau ki a tātau anō. Ko te whakairatanga o te tangata te aronga matua o ngā mahi nei, otirā ngā āhukatanga ka hua mai ka whakatō ki te kōngahungahu e tupu ana i te kōpū o te Whaea.

Mōku anō i noho ēnei kōrero hei arahi i au i taku haputanga; nā te mōhio he aha ngā āria me ngā āhukatanga ka tō ki te kōngahunga, i kaha taku tiaki i taku wairua, i taku māuri i taku tīnana ki a pai ai te tipu o taku tama.

Ko ngā mahi kei te kāhui nei, kua hono ki ēnei āria, arā, te Wairua, te Māuri, te Iho Matua, te Ihi, te Tapu, te Mana, te Wehi, te Whatumanawa, te Hinengaro, te Ngākau, me te Pūmanawa hoki. Ko te rere o te kōwhaiwhai, te tipu o te kōngahungahu, te nohonga o te tiki ki ngā mahi nei e hono ai ki tēnā āria, ki tēnā āria kei Te Aho Matua 1.1 Te Ira Tangata.



Wairua 1

Ngā Whetu

Pepa Waikano 300G 56x76 (ARCO422790)

Waikano

Ko te wairua tērā e hono ai tātau katoa, otirā i a tātau te hunga ora ki a rātau kua ngaro atu ki te pō. E kaha whakaponono ana te Māori he wairua tō ngā mea katoa, otirā e kore te wairua e mate me te tinana o te tangata, engari ka ora tonu.

Na te tauira o tōku Pāpa i hanga, i takoha i tēnei tiki ki tōku Māma, waihoki te tiki o tōku Pāpa ki a rāua. Ko tēnei tiki, me te tiki o tōku Pāpa he tohu whakaoho i aku tūakana i hinga atu i tō rāua whānautanga mai. I kōwhiri i te wairua hei āria mō tēnei, nā runga noa i taku kite i te ao marama, me te pō ki te wāhi tōrunga me te tōraro. Ka kitea kei te wāhi tōrunga a tiki e noho ana, koinei te taha wairua, e kīa nei ko te pō, ā ka kitea ko ngā koru kei muri e puta mai ana i te wāhi tōrunga ki te wāhi tōraro, arā ko te wairua e tūhono ai tātau ki te hunga wairua. Ko te kākāriki he hononga ki ngā tae o Korohe, arā koinei hei hononga ki te taha o tōku Māma.



Te Iho Matua 2

Ngā Whetu me Whetu

Pepa Waikano 300G 56x76 (ARCH0422730)

Waikano

Ko te Iho Matua tērā e hono ai te tamaiti ki ōna mātua, ki ōna kaumatua, tae rawa ki ōna tipuna. Ko te Iho Matua tērā te taura here i te whakapapa o te tangata.

I kowhirihia i te āria nei hei kaupapa here ki tēnei mahi nā runga noa i ngā tiki e rua ka kitea. Ko te tiki kei runga, he rite tonu ki tērā kei te mahi (Wairua 1), arā koinei te hei tiki o tōku Māma, ā ko te tiki kei raro te hei tiki kua heke mai ki tōku Pāpa ki au. Nā ahakoa he tohu whakaoho ēnei tiki mō ōku tuakana, ā Ngā Whetu me Whetu. Mōku anō he mōmō māngai i ōku mātua. E toru ngā paparanga kōwhaiwhai kei te mahi nei, arā koinei hei tōnu ia mātou ko ōku tungāne. Ko te tae māwheo i kōwhiri, nā runga noa i te mahana o te tae. Ko te mahana nei he hono ki te poi poi ā ōku mātua ia mātou ko ōku tungāne, i roto i te Ao Māori, waihoki i roto i Te Aho Matua.



Māuri 3

Whetu

Pepa Waikano 300G 56x76 (ARCH0422740)

Waikano

Rite tonu ki te wairua, he māuri tō ngā mea katoa. Heoi anō ko te rerekētanga o te Māuri me te wairua, ko te Māuri he āhuetanga e rangona ai te tangata. Ko tā te pataka kupu ko te kupu Pākehā mō te Māuri ko te ‘Life Force; nā i te pokepokenga o Tāne i a Hineahuone, ka hongiri a Tāne i a Hineahuone, ā nā wai rā ka tīhei a ia, ā, ko tā Tane ‘māuri ora’, nā te hongiri nei i ora ai a Hineahuone, ā nā tēnei koinei te orokohaga mai o te kupu māuri.

Nā runga noa i tōna whakaoho i te mahara o tōku Pāpa, arā ko ia tērā, i kaha manaaki i tōku māuri ki a ora pai taku noho ki te ao kikokiko nei, otirā nāna i whakatō i ngā āhuetanga whakanoa ki a hiki i te māuri kino ki a noho ko te māuri tau, te māuri pai, te māuri ora.

Ko te whakatakato o te tiki ki tēnei mahi, ka kitea kua uhia te nuinga o te kōwhaiwhai i te tiki, arā koinei hei hononga ki ngā mahi manaaki o tōku Pāpa. Ko tōna tae he rite tonu ki tērā o te (Iho Matua 2). Ka kitea he ruarua ngā koru kei tēnei mahi, kō tāku i tino hiahia ki a noho ko te aronga matua ko te hei tiki o tōku Pāpa.



Hinengaro 4

Mātai, Aio

Pepa Waikano 300G 56x76 (ARCH0422740)

Waikano

Ko te hinengaro tērā ka hono ki ngā kare-ā-roto, ki ngā whakaaro o te tangata, otirā ko te hinengaro ka whakahaere ka whakatau i ngā mahi o te tinana otirā ngā kowhiringa o te tangata i te ao marama.

Ka kitea i te mahi nei, he rerekē tōna hanga ki te toenga o ngā mahi kei te kohinga mahi nei. Nā ko tōna hanga he rarunga i wainganui i te mātai o tāku iramutu a Aio, me ngā ahua tiki i kitea i te hinengaro. Nā nga tae tea me ngā tae pōuri o te kākāriki me te kahurangi, me te nui o ngā paparanga, he rite tonu ki te mahi o te hinengaro, arā he whakaaro, he whakahaere i ngā mahi o te tangata. Ko te kahurangi, te taha ki te whakaaro, ā ko te kākāriki te taha o te whakahaere i te tinana.



Whatu Manawa 5

Mātai, Kimura

Pepa Waikano 300G 56x76 (ARCH0422740)

Waikano

Ko te whatu manawa kua hono ki te manawa me te roro o te tangata. Ko ngā kare-ā-roto o te tangata ka hua mai i te whatu manawa, heoi ki a piri ngā kupu e rua nei ka huri tōna whakamarāma ki te ate, arā he āhuatanga aroha, mahamaha ranei. Ko ngā mea e kaingakau ana ki te tangata kua hono ki te whatumanawa.

Ko te hanga kōngahungahu nei nō ngā mātai tuatahi o tōku tama i te kōpū. I kōwhirihia i te hanga kōngahungahu nā runga noa i te kaupapa o Te Ira Tangata 1.1. I whakarite ahau ki a noho te kōngahungahu ki roto i te ahurumōwai o te kōiri. Ko te koiri e tonu ana i te poipoi o te tangata, i te hā ora anō hoki. Heoi anō ki a āta tirohia ki te hanga o te koiri, ko tāku e kite ai ko te hanga o te wahine e hapu ana. Ko ngā tae he hono ki ngā wai kei te kōpū, arā te waikahu.



Ihi me te Tapu 6

Mātai, Kimura

Pepa Waikano 300G 56x76
(ARCH0422740)

Waikano

He rerekē te Ihi me Tapu, arā ko te ihi he mea e rangona ai te tangata, e kite te tangata, he momo kare-ā-roto hoki. He rite te ihi ki te ihiihi, me te harikoa. Nā ko te tapu he āhuatanga kāore e kitea i te karu, engari ka rongo te wairua o te tangata i te taumaha, Ootirā te rāhuitanga o tētahi mea rānei. Ko te tapu he arahi i te tangata i ngā wā o te rāhui, i te wā e mōteatea ana, hei tapiri e whakapono ana te Māori he tapu te tangata ahakoa ko wai.

Rite ki te (Whatu Manawa 5) ko tēnei mahi me te mahi e whai ake nei nō ngā mātai o taku tama, heoi he marama te kite kua tipu te kōngahungahu me tōna rite ake ki tērā o te tiki. I kaha taku whai i te (whakaahua 14) hei tauira mō te mahi nei, nā runga i tōna tipu, otirā i māori noa tōna noho i waenganui i te pepa, me ngā nahi kōwhaiwhai. He rite kei te awhiawhi ngā koru o te kōwhaiwhai i te kōngahungahu. Ko ngā tae i kowhirihia mai i te rākau Magnolia kei mua i te whare toi o Papa Taepa. I tino hiahia ahau i tētahi mea hei hono ki te whare nāna māua i poipoi, otirā i manaaki i te mauri mō ngā mahi kei te tuhinga whakapae nei. I tino hiahia ahau ki a kite, ki a rongo te tangata i te tauawhitanga i waenganui i te kōwhaiwhai me te kōngahungahu i roto i tēnei mahi, me ngā mahi kei te tuhinga whakapae nei.



Mana me te Wehi 7

Mātai, Kimura

Pepa Waikano 300G 56x76
(ARCH0422740)

Waikano

E rua ngā mana rerekē ka utaina ki te tangata, heoi ki oku nei whakaaro ko te mana kei te kōrerohia e Te Aho Matua, ko te mana whakaheke. Ko tēnei mana kua heke mai i ngā atua, ki ngā tipuna, heke tonu ki ngā kaumatua, heke tonu ki ngā mātua, ka haere tonu ki ngā tamariki me ōna uri whakaheke. Ko te mana nei ka pūmau te noho ki te tangata.

Ko te wehi he ahuatanga e rongō ai te tangata. Nā i ōna wā ko te wehi he mea whakamihi i te tangata, ā i ēra atu wā ko te wehi he momo kare-ā-roto, arā te matakū me te āwangawanga.

Ko te nuinga o ngā mahi kōwhaiwhai kei te kahui mahi nei, i tukuna ki a rere noa te peita, otirā te paraihe peita. Mā te wairua, me te māuri e kawē i te ringaringa ki a hua mai ko tētahi āhuatanga māori. Ka toro te ringa o te kōngahungahu ki te koru, arā me te mea nei e mau ana i te kōwhaiwhai, koinei ia e pupuri ana ki tōna mana whakapapa, me tōna mana whakaheke. Ko ngā tae, ngā tino tae o māua Raniera, koinei hei tohu i tō māua hononga ki tō māua tama, otirā i te whakairatanga o tō māua tama a Kimura.



Te Ngākau, Te Pūmanawa 8

Mātai, Kimura

Pepa Waikano 300G 56x76
(ARCH0422740)

Waikano

Ko tā kui Katerina ko te ngakau te mata o te wairua, arā ko te ngākau te kuaha ki te wairua o te tangata. Ka rongō te ngākau i te hari, i te koa, i te pōuri, i ngā

kare-ā-roto rerekē o te tangata, arā hoki ko te ngākau tērā kua hono ki te wairua, ki te hinengaro, ki te manawa o te tangata.

Ko te pūmanawa ngā tino uaratanga o te tangata, arā ko ōna pukenga Māori noa.

Ka kite i te kohinga mahi nei i kaha taku hoki hoki, ki ngā mātai o tāku tama hei tauira mō aku mahi. Nā te āhua o te kōwhaiwhai i tau te whakaaro ki a rua ngā kōngahungahu ki te mahi nei. Hei tapiri ko te Kuia, me te tupuna kuia o taku tama i te taha o tōna Pāpa he mahanga, koinei hei hononga ki a rātou. I kowhirihia i te karaka, nā runga noa i tōna hononga ki au, arā koinei taku tino tae, me te tino tae o tōku Pāpa. Ko te karaka he hononga ki taku taha Ngāti Te Maunga, arā te taha o tōku Pāpa.

Kupu Whakakapi:

E whakapono ana ahau he painga tō ngā kōrero kei te wāhanga 1.1 Te Ira Tangata mō te taha ki te whakairatanga o te tamaiti. Ko ngā kōrero, me ngā ariā he kupu arahi i te whaea, me te whānau mō te taha ki te tipu o te kōngahungahu ki te kōpū o te whaea, hei tapiri ka whaimaramatanga ki te taha poi-poi me te whakatipu o te tamaiti Māori i tēnei ao hurihuri.

I te tuhinga whakapae nei, i kaha taku hono i te kohinga mahi ki ngā mātāpono me ngā ariā o te 1.1 Te Ira Tangata. I tutuki ahau i tēnei mā te hoki ki ngā kōrero whakapapa o Te Aho Matua, otirā ki ngā kōrero whakapapa i akona i raro i te maruamaru o Te Kura Kaupapa Māori. Nā tēnei ka kite i te hononga o ngā mea katoa, waihoki ka whai maramatanga te tangata ki tētahi wāhanga iti o Te Aho matua.

Kua kite ahau he tino taonga ngā kōrero nei mō te taha ki te tupu o te tamaiti. I kite hoki ahau i roto i aku mahi rangahau, ehara i te mea ko te tamaiti anake ka tupu, engari anō ko te whaea, arā, ā tinana nei, ā hinengaro anō hoki. Mā te marama ki te tipu o te tamaiti ka marama hoki te whaea me pehea te tiaki i a ia anō, ki a pai ai te tipu me te tō o ngā ariā ki te kōngahungahu i te kōpū. Ka arahi ngā ariā i te whaea me te whānau ki te taha whakatipu, me te poi-poi i te katoa o te tamaiti, otirā tōna ao Māori i tēnei ao hurihuri.

I tirohia ahau ki ngā mahi kōwhaiwhai o Ngātaiharuru rāua ko Kura, otirā ka kite hoki i te tauira o ā rāua mahi ki roto i taku kohinga mahi *Te Ira Tangata*. Arā ko te whānau me te tamaiti te taura here i ō mātau mahi.

Ka kite ko te 1.1 Te Ira Tangata te tūāpapa o aku mahi, heoi anō ko ngā kōrero whakapapa, me ngā kōrero tuku iho e tuhono ai te kaupapa me te kohinga mahi *Te Ira Tangata*. Hei tapiri ki tēnei ko ngā kohiga kōrero nei he whakaatu i te tirohanga o te raukura ki tēnei mea te whakatipu uri. I kite ahau i roto i ēnei mahi rangahau i arahi ngā mātāpono o Te Aho Matua i au me te whakairatanga o taku tama.

Ko ngā mahi nei, he whakatinana i te Wairua, te Mauri, te Iho Matua, te Ihi me te Tapu, te Mana, me te Wehi, Te Whatumanawa, te Hinengaro, te Ngākau, ā hei whakakapi, te Pūmanawa ka tō ki te kōngahungahu, otirā kua tō ki roto ia tātau kātoa.

Bibliography

- Aotearoa, T. R. (n.d.). *Te Aho Matua*. Retrieved 2022, from <https://runanga.co.nz/panui/>
- Aotearoa, T. R. (n.d.). *Te Aho Matua o Ngā Kura Kaupapa*. Retrieved 2022, from <https://runanga.co.nz/te-aho-matua/#teira>
- Austin, D. (Kāhore he rā). Te Hei Tiki.
- Birch, P. T. (2006, 2018). Te Whakapapa Kōwhaiwhai.
- Kaupapa, T. R. (2006). *Official Version of Te Aho Matua o ngā Kura Kaupapa Māoei*. Wellington .
- Kaupapa, T. R. (2006). *Te Aho Matua o Ngā Kura Kaupapa Māori*. Retrieved 2022, from <https://runanga.co.nz/>
- Mataira, K. T. (2000). *Te Tuakiri o te Tangata*. Te Ataarangi Educational Trust.
- Otimi, N. (2022). Tiki. (Rereao, Interviewer)
- Rewiri, K. T. (2014). Five Māori Painters. (Toi, Interviewer)
- Rewiri, K. T. (2023). Tēnei au, Tēnei au . (Rereao, Interviewer)
- Taepa, N. (2017). (Rereao, Interviewer)
- Taepa, N. (2022). *Timmelville*. Retrieved from <https://www.timmelville.com/exhibition/ngataiharuru-taepa/>
- Tamariki, N. P. (1900s). Te Whakapapa Wai.
- Tamariki, N. P. (1990s). Te Whakapapa Ira Tangata.
- Tocker, K. (2019). Te Orokohanga o Te Aho Matua. *10.20507/MAIJournal* , 256.